

Churer Schnudergoofa

Ausschnitte aus dem Programm 2014

Mit zwanzig Milliona bar uf d'Hand hät Trachsel Hansjörg wella
dr Bündner Tourismus im Markt mit meh Struktur uufstella.
D'Umsetzig seg in d'Hosa meint er jetzt und lacht versöhnlich,
er wüssi gnau warum, er kenni d'Schwachstell jo persönlich.
Wenn'd tängsch, jetzt hämmer Aafangs März, das Johr, das goot no lang
und gnau so lang regiart er no, do wird's üs angscht und bang.
Miar wärend dä schu längschtens los, a Schtanga Geld, dia wetti,
wenn dä zu irgendwas a Dokterarbet gschriba hetti.

Dia Rückruaf-Aktion vur Stadtschual macht üs putzvaruggt,
jetz wännd dia alli Bambusschtägga, wo s' verschänggt händ, zrug.
Da Ziita ohne Prügelschtroof khönnd miar jetz nochatruura
Ab'r ohni Schtägga kriagsch dä Lehrplan 21 nid duura!

Dr Justin Bieber kiff und suuft und liefarat Schkandal,
uf youtube hangt er anara Schlampa, isch das nid brutal?
A Hoor am Kini fehlt no immer und dr Sctimmbruch au,
im Fall, dass dä je gschlechtsriif wird, dänn git's us dämm a Frau!
Warum isch dä nid in dr Schual, und lernt sis Hirni bruucha?
Mit Mathe khönt'sch däm Typ dia linggi Hälfti richtig schluucha.
Dia rechte wär im Turna dra, dänn wär er geischtig fit,
miar händ nu Angscht, dass bi däm Depp nu ei so Hälfti git!

Dr neuu Papscht Franziskus händs im März brutal schnell gwählt
Da Journis hät d'Dramaturgie vum Warta komplett g'fehlt.
Dr Grund warum das wiissa Räuchli uufschtigt huara gschwind
Isch nu dass d'Kardinäl könn schneller hei zu Frau und Kind.

Zürcher Katholigga händ im Herbscht am Huonder gschriba,
sie wellend jetz an eiges Bistum, statt im khurer z'bliiba.
Do khasch als bündner Katholigg nu heimlich niidisch sii:
Wenn däna das sött glinga, wett au i a Züzi sii!
No besser wär natürli, wenn er endlich d'lisicht hett',
A Rücktritt, au a kliina, liaba Huonder, das wär nett.
Doch d'Frog isch nu, wo tuasch dä hii, d'Welt isch no nid so wit,
dass' Endlager für hochreligiösi Abfäll git.

Au d'Stadtschual hät jetz - do verreggsch – a Hotline für dahei,
für Zügnisnota vu dim Goof druggsch du die Taschte 2.
Und in dr Hotline vu da Bulla sägend s' wenn d' im Rugga
dr Atem vu dim Mörder gschüürsch - khasch d'Raute-Taschta trugga.

Fascht 18 Tuusig Tütschi händ üs letscht Johr verloht,
warum dia wieder hei gönd, miar khönnd das nid verschtöh.
Sie hegend d'Schnorra gschtricha voll, begründen das au nett:
Will's in dr Schwiiz für sie halt eifach viil z'viil Tütschi hät.
Was d'Welt jetz do erläba tuat, isch absolut historisch
und miar drei khönn no gar nid glauba, dass das würklich wöhr isch:
Das wär jo ds erscht Mol in dr Gschicht, dass d'Schwoba no am End
A Land wo's müasam bsetzt händ freiwillig zruckgeh wänd.

Früaner bisch mit sexi in da Khindergarta kho,
a paar Johr schpöter händs dia Knirps, wo füfi sind schu gno.
Dr Schtatus Quo isch hüt sogar: Mit viari dörf ma go,
dr litrittstescht isch eifach, muasch nu selber khönna shtoo!
Lut Shtadt bisch ab am nögschta Summer schu mit drei drbii
und gäng au das guat, für ma sofort in da Kindsgi ii,
an Egga, wo d' als Mami easy - khasch go gebära goo
und zur perfekta Föderig, dr Goof grad dötta loo.